

“World café” per i Fon strategich teritorièl

Aministradores e raprezentanc di desvalives setores de la sozietà fascèna se à binà ai 23 de november te senta del Museo Ladin per meter dant la costions de emportanza per la val



Aministrations - Na carantina de persones e cater desc per rejonèr, a rotazion, de cater intervenc de svilup local, per l secont model de azions del “Fon strategich teritorièl”, dò da la cordanza metuda en esser su la pruma clasc de azion de adatament de calità/cantità di servijes.

A chesta vida, ai 23 de november te la sala Heilmann del Museo Ladin de Fascia l'è stat fat l “World café”, che l'à tout ite la procuradora Elena Testor, i ombolc Silvano Parmesani de Cianacei, Ivo Bernard de Ciampedel e Devi Brunel de Soraga, che i à fat da coordenadores di gropes e esponenc del mond imprenditorièl, economich, culturèl, de la scola e de la sociazions de val.

N debatit percacenc, envià via da la paroles de Carlo Daldoss, assessor provincièl a urbanistica e enc local: «Se trata de n moment emportant de condivizion e partezipazion, da pèrt di raprezentanc di desvalives setores de la sozietà, per endrezèr l davegnir de la val. Chesta scontrèdes é states pissèdes percheche la comunanzes locales posse aer l met de se palesèr e didèr la amministrazioni, l Comun general e la Provincia a ge dèr luster a la prioritèdes da sostegnir col Fon strategich. Apede ai 3.276.000 euro jà destinè a Fascia, dant che sie fora l'an, la Provincia metarà a la leta di teritories etres 13 milions de euro che no i sarà spartii a na vida matematica, ma tegnan cont de la proponetes de maor enteress. Da na val turistica desche Fascia, emportanta per dut l sistem

economich provincièl, me spete idees de intervenc percacenc per i egn che vegn».

La scontrèda, donca, la é jita inant, dò dal salut de Elena Testor, che l'à sottrissà l segnificat de la senta del Museo olache l'è stat fat la radunanza per rejonèr del davegnir de Fascia, con chi che à tout pèrt che i se á spartì fora ti desvalives desc, dò n confront de vint menuc su ogni argument.

I intervenc strategies de svilup local i tolea ite: la valorisazion de la ressors naturèles, culturèles e del turism sostegnibol e l sparagn energetich e la firmes del post che se cruzia de energia renovabola.

Tel detai al “world café” se à rejonà

de: miorament de la situazion urbanistica di paijes, calità di spazies, vita e perferida turistica; infrastructures de delet e sportives, per na ezelenta perferida turistica; contest rurèl e teritories da mont; fontènes renovaboles e maora efizienza energetica di fabricac publicis.

I projec de svilup local, stabiliu tras ches prum prozess de partezipazion, i sarà regoec te na cordanza de program, che la vegnarà portèda dant per la osservazions e la valutazions del prozess dezisif publich, economich-sozièl.

L program vegnarà aproà ti meis che vegn dai Consees de Comun, dal Comun general e da la Provincia.



I partezipanc al World Café te Museo Ladin de Fascia con l'assessor provincièl Carlo Daldoss e la procuradora del Comun general de Fascia Elena Testor.